

[] las que vos cunplieren en esta razon, e esto vos prometo como rey e señor de vos lo tener, e guardar, e conplir así. E porque desto seades çiertos escriui en esta aluala mi nonbre.

Fecho dieziocho dias de abril era de mill e quatroçientos e çinco años.

Yo el Rey.

1367-IV-18, Burgos.—Provisión de Pedro al concejo, alcaldes y oficiales de la ciudad de Murcia, confirmando en el adelantamiento del reino de Murcia a Martín López de Córdoba, tal como lo tenía antes que él tuviera que salir de sus reinos. (A.M.M., C. R. 1367-1380, folio 2 r.º).

Don Pedro por la graçia de Dios rey de Castiella, de Leon, de Toledo, de Gallizia, de Seuilla, de Cordoua, de Murçia, de Jahen, del Algarbe, de Algezira e señor de Vizcaya e de Molina, al conçeio, e a los alcaldes, e otros ofiçiales qualesquier de la çibdat de Murçia e de todas las otras çibdades e villas, e lugares de su regno, e a cada vnos de vos que esta mi carta vieredes, salud e graçia.

Bien sabedes en como don Martin Lopez, maestre de Calatrava, mio camare-ro e mio [] e de don Sancho mio fijo, auia el adelantamiento del dicho regno de Murçia al tiempo que yo parti de los mios regnos, e agora tengo por bien que aya el dicho adelantamiento de aqui adelante segund que lo solia uer.

Porque vos mando, vista esta mi carta, que ayades por adelantado mayor de y de Murçia e de todas las otras çibdades, e villas e lugares de su regno al dicho maestre de Calatraua, e vsad con el en el ofiçio de dicho adelantamiento o con el que el y pusiere por si, segund que mejor e mas conplidamente vsauades con los adelantados mayores que y fueron fasta aqui, e recodilde e fazelde recodir con el salario e derechos que al dicho ofiçio del dicho adelantamiento pertenesçen, segund que mejor e mas conplidamente recudiestes a los adelantados que y fueron fasta aqui. E los vnos ni los otros non fagades ende al por ninguna manera so pena de la mi merçed e de seysçientos maravedis a cada vno. E desto le mande dar esta mi carta seellada con mio [sello de çera].

Dada en Burgos, deziocho dias de abril era de mill e quatroçientos e çinco años.

Yo el Rey.

